

大方廣佛華嚴經卷第二十六

卷六

唐罽賓國三藏般若奉詔譯

入不思議解脫境界普賢行願品

爾時善財童子正念思惟彼大願精進力等護一切衆生光明夜神以解脫力現等一切

卷六

衆生心所見身現等一切衆生形像身現等無邊色相海身現等一切處方俗威儀海身普門示現如是等身隨諸衆生心之所應以種種方便教化成熟令其開悟增長善根隨順修行證入甚深菩薩解脫善財如是以正

念力憶持分別彼主夜神所得解脫所有教法一字句名相體性以總持力憶念攝持以慧解力分明顯示以行願力發起廣大如是隨順獲得無量殊勝功德漸次南行度恒河北入憍薩羅國向迦毗羅城詣嵐毗尼林到已右繞周旋求覓妙德圓滿愛敬林神見在林中大寶樹下莊嚴圓滿寶樓閣中坐摩尼藏師子之座二十億那由他諸林神女前後圍繞廣為演說一切菩薩受生海經令其皆得生如來家疾入菩薩大功德海善財見

已頂禮雙足合掌前立作如是言大聖我已先發阿耨多羅三藐三菩提心而未知菩薩云何生如來家云何行菩薩行云何能作一切衆生種種照世大光明燈時彼林神告善財言善男子菩薩有十種受生藏若諸菩薩成就此法則能速疾生如來家念念增長菩薩善根不休不懈不退不斷無厭倦無繫縛無疑惑無迷亂無怯弱無惱悔無遺失一切智體等十方界隨順佛境入法界門不退廣大菩提之心增長一切波羅蜜行捨離一切

世間趣類疾入一切如來智地神通智力常現在前種種佛法皆能順入究竟獲得真實義境何等爲十所謂願常供事一切諸佛菩薩受生藏普徧成就菩提心菩薩受生藏觀諸法門方便修行菩薩受生藏以深淨心普照三世菩薩受生藏平等光明普照一切菩薩受生藏生三世一切諸如來家菩薩受生藏佛力光明普徧莊嚴菩薩受生藏微細觀察普徧智門菩薩受生藏法界變化種種莊嚴菩薩受生藏速疾履踐諸如來地菩薩受

卷六

三

生藏善男子云何名願常供事一切諸佛菩薩受生藏善男子此菩薩初發心時作如是願我當親近承事諸佛及諸菩薩現見諸佛恒生歡喜於諸佛所以尊重心恭敬供養無有厭足增長淨信心無退轉積集功德恒不斷絕爲欲清淨一切智性積集善根令增長故是爲菩薩第一受生藏云何名菩薩普徧成就菩提心受生藏善男子此菩薩發阿耨多羅三藐三菩提心所謂起深厚大悲心於諸衆生能救護故起供養諸佛心令諸如來

增歡喜故起勤求正法心於諸所有無恡惜故起所作廣大心令一切智悉現前故起圓滿大慈心爲普攝取一切衆生作饒益故起不捨衆生心被求一切智堅誓甲故起無諂幻心得如實智普照一切差別法故起如說卷六而行心修習菩薩一切難行諸苦行故起不誑一切諸佛心願常守護一切如來大誓願故起一切智大願心盡未來際調伏衆生無斷絕故此十爲首有佛刹極微塵數菩提心大功德聚若諸菩薩成就此法則得常生諸

如來家是爲菩薩第二受生藏云何名菩薩
觀諸法門方便修行受生藏善男子此菩薩
於一切法門海起現前觀察心於一切智圓
滿道起成就迴向心於諸威儀清淨業海起
正念觀察心於一切菩薩種種三昧海起普
徧清淨心於一切菩薩種種功德海起修習
成滿心於一切菩薩道起莊嚴出生心於一
切智精進功德起如劫火熾然不休息心於
一切衆生界起令成就普賢行心於一切威
儀中起修菩薩種種功德心於真實中道起

捨離有無入真實正觀心是爲菩薩第三受
生藏云何名菩薩以深淨心普照三世受生
藏善男子此菩薩成就清淨增上深心得佛
菩提光明徧照深入菩薩方便法海其心堅
固猶如金剛攝取衆生畢竟不捨遠離一切
諸有趣生成就如來種種神變起於菩薩殊
勝行願具足菩薩明利諸根增長菩薩清淨
善心成就不動大誓願力得諸如來之所護
念破壞一切諸障礙山與諸衆生作所依怙
是爲菩薩第四受生藏云何名菩薩平等光

明普照受生藏善男子此菩薩具修種種方便行海調伏成熟一切衆生一切所有悉能棄捨成就無邊清淨戒體住佛境界具足安忍得一切佛法忍光明以大精進勇猛志力趣向出生一切智體勤修清淨諸三昧門成就一切神通智力以智慧光照明法界得一切法差別光明成就清淨無障礙眼見一切佛諸色相海悟入一切甚深法性自在教化成就衆生能令世間皆生歡喜勤修差別如實法門是爲菩薩第五受生藏云何名菩薩

生三世一切諸如來家受生藏善男子此菩薩生如來家隨如來住成滿一切殊勝行門具足三世如來願海得一切佛純一善根與一切佛同一體性成就出世白淨法行安住普賢廣大功德入一切佛甚深三昧見一切佛自在神力所化衆生咸令清淨得佛平等迴向法門能隨問答辯才無盡是爲菩薩第六受生藏云何名菩薩佛力光明普徧莊嚴受生藏善男子此菩薩深入一切佛威神力光明徧照心不退轉遊諸佛刹無有動作承

事供養菩薩衆海無有疲厭如實了知諸法如幻知諸世間悉皆如夢見一切佛示現色身所有相好猶如光影知一切佛神通所作自在遊戲猶如變化知諸有趣隨類受生如鏡中像知一切佛所轉法輪令衆生聞如空谷響以方便力開法界門咸令證入到於彼岸是爲菩薩第七受生藏云何名菩薩微細觀察普徧智門受生藏善男子此菩薩住童真位獲得菩薩種種威儀一切功德具足圓滿微細觀察一切智門於一一門盡無量劫

開演分別無邊菩薩所行境界於諸菩薩甚深三昧心得自在成就最勝諸波羅蜜念念普生一切世界諸如來所能於一切差別境中入於平等無差別定於無差別平等法中現於自在有差別智於無量無邊境中自在入出無有障礙於無境中起於種種差別境界於微小境中見廣大境於廣大境中見微小境知諸世間皆假施設通達諸法因緣性相皆是自心之所現起是爲菩薩第八受生藏云何名菩薩法界變化種種莊嚴受生藏

善男子此菩薩於念念中種種莊嚴無量佛刹普隨衆生現變化身得無所畏最勝彼岸示現種種諸佛威儀成就種種方便善巧依止清淨無礙法界隨衆生心現衆色相令其見者無不調伏普使安住不思議乘具足開演成菩提行行無障礙一切智道相續出現轉於法輪住無中邊薩婆若海隨所應化不失其時常能平等正念饒益成就如來智慧之藏是為菩薩第九受生藏云何名菩薩速疾履踐諸如來地受生藏善男子此菩薩悉

於三世諸如來所受灌頂法悉知一切三世諸佛同一體性境界次第所謂知一切世界隨心現起相續次第知一切衆生前後沒生相續次第知一切衆生種種心念相續次第知一切菩薩前後際劫六凡所受生相續次第知一切菩薩前後際劫所行之行相續次第知一切菩薩所有修習種種智境相續次第知一切諸佛前後際劫現成正覺相續次第知一切法功能善巧親近供養相續次第知一切劫盡前後際若成若壞種種事相種種

名號相續次第知隨所應度現成正覺功德莊嚴開悟調伏示現威力智慧神通轉正法輪令諸衆生親近供養皆不失時相續次第於無邊衆生界以巧方便而調伏故是爲菩薩第十受生藏善男子如是菩薩十種受生藏一切菩薩無不從生若諸菩薩爲欲成就廣大菩提修習增長圓滿此法則能積集種種功德於一莊嚴中出一切莊嚴普徧莊嚴一切佛刹示現變化種種威儀普徧調伏諸衆生界盡未來劫無有休息諸佛法海種種

因緣種種境界展轉流通相續不斷現前覺悟無不周徧現不思議佛自在力普徧充滿虛空法界於諸衆生心行海中爲攝取故而轉法輪普於十方一切世界諸如來所親近不捨無量法雲普徧現前以清淨音演諸法七海住一切處所行無礙以一切法妙光明網莊嚴種種菩薩道場隨諸衆生心之樂欲開演無邊種種法藏顯示種種諸佛境界隨應開悟一切世間爾時嵐毗尼園妙德愛敬林神欲重宣說菩薩廣大受生藏義以佛神力

觀察十方為善財童子而說偈言

最上無垢深淨心 見一切佛無厭足

願盡未來常供養 此明慧者受生藏

三世一切刹海中 所有衆生及諸佛

悉願救度恒瞻敬 此名稱者受生藏

受法雲雨無厭足 普觀三世無所著

身心清淨如虛空 此無比者受生藏

心恒遊止大悲海 堅固高勝如須彌

通達一切種智門 此自在者受生藏

大慈徧覆於十方 普行無垢波羅蜜

以法光明照羣品 此凶猛者受生藏

覺法自性心無礙 生於三世諸佛家

深入法界智無邊 此明智者受生藏

法身清淨心無著 普詣十方無量土

一切佛力靡不成 此難思者受生藏

入深智海得自在 住三昧海咸究竟

觀一切智方便門 此實智者受生藏

嚴淨一切諸佛刹 成熟一切諸羣生

現佛神力普莊嚴 此大名者受生藏

諸佛法智皆修習 速能普入如來地

了知法界皆無礙 此真佛子受生藏

善男子若諸菩薩具此十種受生藏則得生
如來家爲諸世間作大明燈善男子我得此
一切菩薩自在受生解脫門無量劫來神通
遊戲顯示菩薩無礙境界善財白言聖者此

卷六

解脫門境界云何林神答言善男子我先發
願願一切菩薩現受生時我身皆得親近供
養願入毗盧遮那如來無量廣大受生海以
昔願力而來生此娑婆世界此四天下閻浮
提中迦毗羅城嵐毗尼園於此林中專念善

薩何時下生經一百年果見世尊從兜率天
而來下生善男子爾時菩薩將下生時此大
林中先現十種莊嚴瑞相何等爲十所謂一
者此林中地忽自平坦坑坎堆阜悉皆不現
二者林中所有荆棘瓦礫不淨之物皆悉不
現金剛爲地衆寶莊嚴如歡喜園柔軟細妙
三者園中復有寶多羅樹其根深植下至水
際次第行列分布莊嚴四者林中復現一切
香牙一切香藏塗香末香幢旛寶蓋及諸妙
寶摩尼形像種種香樹蔭暎莊嚴出過人天

所有香氣五者林中復有諸妙華鬘寶莊嚴
具處處充滿微妙分布六者林中一切諸大
寶樹自然開發摩尼寶華於華葉間流出真
金柔軟鬘線七者林中所有一切池沼皆生
妙華柔軟鮮潔從地涌出彌布水上八者時
此林中娑婆世界所有欲色諸大天王及諸
天龍夜叉乾闥婆阿脩羅迦樓羅緊那羅摩
睺羅伽鳩槃荼等一切世主莫不來集合掌
而住九者此三千世界所有欲界諸天姝女
龍女夜叉女乾闥婆等及諸世主一切姝女

皆生歡喜各持種種諸供養具向畢洛叉樹
恭敬而立十者十方所有一切諸佛皆從齋
輪放大光明名菩薩受生種種自在燈普照
林中一切諸物一一光中悉現諸佛受生誕
生所有神變及現一切菩薩受生種種功德
又出諸佛種種言音令諸衆生咸得聞見是
爲林中十種瑞相現此相已時諸天王及諸
世主即知菩薩當欲下生我時見此十種瑞
相難思境界心生歡喜踊躍無量善男子時
菩薩摩耶夫人出迦毗羅城入此林時復

現十種光明瑞相普照一切令諸衆生得一切智法性光明速疾增長歡喜愛敬何等爲十所謂於此林中衆寶樓閣香牙香藏悉放光明普照十方一切世界又此林中一切池沼所有蓮華悉放光明於光明中出微妙音演說如來真實法句又令十方一切世界初發心菩薩悉放光明而來照此嵐毗尼林無不徧滿又令十方一切佛刹所有住地諸大菩薩現大神變放大光明而來照此嵐毗尼林又令十方一切佛刹修行成就圓滿一切

波羅蜜行諸大菩薩放大光明而來照此嵐毗尼林又令十方一切佛刹住大願海諸大菩薩悉放一切自在無礙願智光明而來照此嵐毗尼林又令十方一切佛刹住大悲海諸大菩薩悉放一切願智光明而來照此嵐毗尼林又令十方一切佛刹住方便海諸大菩薩悉放種種調伏衆生善巧光明而來照此嵐毗尼林又令十方一切佛刹諸大菩薩悉放真實教智光明而來照此嵐毗尼林又令十方一切佛刹諸大菩薩放一切佛自在

下生出家成道大智光明而來照此嵐毗尼
林此十種光明出現之時普令除滅一切衆
生無明黑闇善男子時摩耶夫人現此十種
光明相已於畢洛叉樹下將欲誕生復現十
種廣大神變何等爲十善男子菩薩將欲誕
生之時色界天王及諸天子欲界諸天及諸
婁女諸龍夜叉乾闥婆阿脩羅迦樓羅緊那
羅摩睺羅伽一切世主并其眷屬爲供養故
皆悉雲集時摩耶夫人色相威德莊嚴殊勝
身諸毛孔咸放光明如燈如日如融金聚普

照三千大千世界無所障礙其中所有一切
光明咸皆隱蔽悉不復現除滅一切衆生煩
惱及惡道苦是爲菩薩將誕生時第一神變
又善男子當爾之時摩耶夫人於其腹中悉
現三千大千世界一切形像其中百億四天
下閻浮提內種種都邑各有園林名號不同
一一皆有摩耶夫人各於樹下一切世主并
其眷屬圍繞而住悉現菩薩將欲誕生不可
思議莊嚴之相是爲菩薩將誕生時第二神
變又善男子摩耶夫人於身一切毛孔之中

悉現世尊毗盧遮那過去所修菩薩行時親
近供養一切諸佛及聞諸佛說法音聲音震
十方一切世界諸所現境如於明鏡及淨水
中能現虛空日月星宿雲雷等像摩耶夫人
身諸毛孔所現如來過去所行神通等事亦
復如是是爲菩薩將誕生時第三神變又善
男子摩耶夫人身諸毛孔一一皆現如來往
修菩薩行時所住一切世界海一切世界種
世界體性世界形狀及世界中城邑聚落山
林河海泉流池沼所度衆生所經劫數所有

佛現所入淨刹所有受身所有壽命所事善
友所得法門所修行願所獲果證從初發心
乃至獲得不退轉地於一切處在在所生摩
耶夫人皆爲其母如是如來過去所有一切
境界於毛孔中靡不皆現是爲菩薩將誕生
時第四神變又善男子摩耶夫人一一毛孔
顯現如來過去所修菩薩行時凡所受生種
種色相種種形貌種種威儀種種資具衣服
飲食苦樂等事一一明現無不辯了是爲菩
薩將誕生時第五神變又善男子摩耶夫人

身諸毛孔一一皆現世尊過去修施行時捨
所難捨身分肢節頭目耳鼻唇舌牙齒血肉
骨髓肝膽腸胃皮膚筋脉及其妻妾男女眷
屬宮殿城邑及諸珍寶金銀瑠璃珂貝璧玉
瓔珞環珮衣服飲食如是一切內外諸物亦
見受者種種方處形貌言辭是為菩薩將誕
生時第六神變又善男子時此林中普現過
去一切劫中所有諸佛入母胎時種種佛刹
種種園林種種莊嚴種種眷屬及其種種幢
幡傘蓋華鬘衣服塗香末香摩尼寶等種種

瓔珞諸莊嚴具種種伎樂歌詠讚歎上妙音
聲徧滿林中令諸衆生普得聞見是為菩薩
將誕生時第七神變又善男子摩耶夫人從
其身中胎臟之內出現菩薩應所受用摩尼
寶王宮殿樓閣超過一切天龍夜叉乾闥婆
阿脩羅迦樓羅緊那羅摩睺羅伽及諸人王
之所住處摩尼王網羅覆其上復以一切人
天形像摩尼寶王諸莊嚴具校飾莊嚴熏以
無垢上妙香王令諸衆生心得清淨如是一
切徧滿林間各各差別不相雜亂是為菩薩

將誕生時第八神變又善男子摩耶夫人從其腹中出十不可說不可說百千億那由他佛刹極微塵數菩薩摩訶薩其諸菩薩身形容貌色相光明進止威儀神通眷屬一切皆與毗盧遮那菩薩等無有異悉共同時讚歎如來是為菩薩將誕生時第九神變又善男子摩耶夫人將欲誕生菩薩之時忽於其前從金剛際出大蓮華名一切寶王莊嚴藏以無能勝金剛摩尼王寶為莖以衆生影像海摩尼王寶為藏一切上妙摩尼王寶而作其

第六

十三

鬘清淨無垢如意寶王以為其臺有十佛刹極微塵數葉一切皆以摩尼所成周匝莊嚴光輝間發摩尼寶王而為其網周匝垂覆堅固難壞金剛寶王而為其蓋以覆其上一切天王所共執持一切龍王起大香雲降注香雨一切諸天雨天妙華及諸嚴具一切夜叉王恭敬圍繞一切乾闥婆王出美妙音歌讚菩薩往昔親近供養諸佛所有功德一切阿脩羅王捨憍慢心曲躬恭敬合掌頂禮一切迦樓羅王銜寶繒帶莊嚴虛空一切緊那羅

王發歡喜心歌詠讚歎菩薩功德一切摩睺
羅伽王皆生歡喜出大音聲歌詠讚歎普
一切寶莊嚴雲是為菩薩將誕生時第十神
變

善男子我見摩耶夫人於此園林將誕菩薩
示現十種神通之相不可思議種種功德無
量光明心無猒足摩耶夫人然後右脇而生
世尊如虛空中現淨日輪如高山頂出於慶
雲如密雲中而曜電光如夜闇中燃大火炬
爾時菩薩從母脇生身相光明亦復如是善

男子菩薩是時為欲顯示一切諸法如影如
像如夢如幻無去無來無生無滅示現誕生
善男子我當見佛毗盧遮那於此四天下閻
浮提內嵐毗尼園示現初生神變之時亦見
如來於三千大千世界百億四天下閻浮提
中嵐毗尼園示現初生種種神變亦見於三
千大千世界極微塵數佛刹亦見於百佛世
界極微塵數佛刹乃至十方一切世界極微
塵數佛刹示現初生種種神變亦見在於十
方世界極微塵中所有種種無量佛刹一一

卷六

十四

皆現受生誕生種種神變如是念念盡未來際普於十方一切法界所有刹海一一塵中無量世界亦現初生種種神變次第相續無有間斷雖念念中普徧一切無邊刹海示現誕生種種神變而心無著無有障礙爾時善財童子白妙德圓滿愛敬吉祥嵐毗尼園主林神言聖者菩薩云何住最後身要生於此大族姓中林神告言善男子一切菩薩將成正覺住最後身皆生玉宮或生大族婆羅門家何以故爲能成就種種利益調伏自他令

成熟故善男子能利自他有三種法一者異熟因果二者福德因果三者智慧因果云何異熟謂有八種一者壽量圓滿二者色相圓滿三者種族圓滿四者自在圓滿五者信言圓滿六者大勢圓滿七者丈夫相圓滿八者勇力圓滿善男子云何菩薩壽量圓滿所謂壽命長遠久修世間云何菩薩色相圓滿所謂形色端嚴相好殊勝人所樂見心無厭足云何菩薩種族圓滿所謂生於豪貴刹帝利種婆羅門家云何菩薩自在圓滿所謂得大

第六

十五

財位及大眷屬所作隨心人所宗奉云何菩薩信言圓滿所謂出言誠諦人必信受理諸諍訟心無高下凡所決斷如執權衡言行無違無求無諂云何菩薩大勢圓滿所謂名稱高遠勇猛精進志性柔和毀譽不動工巧藝業無能過者處大衆會咸所尊重云何菩薩丈夫相圓滿所謂具丈夫相離諸殘缺云何菩薩勇力圓滿所謂報力殊勝身常無病心力勇健有勝堪能如是八法是爲菩薩異熟圓滿善男子菩薩云何修此八種異熟之因

所謂菩薩於諸衆生起大慈愍無殺害心是爲壽量圓滿之因若諸菩薩於佛菩薩形像之前及諸一切黑闇之處施諸光明及施種種鮮潔衣服是爲色相圓滿之因若諸菩薩處於種種部類之中心常謙下是爲種族圓滿之因若諸菩薩於諸貧賤困厄衆生隨心所欲而行給施是爲自在圓滿之因若諸菩薩常修實語和合語柔軟語不變異語是爲信言圓滿之因若諸菩薩爲欲攝取未來世身種種色相殊勝功德發大誓願供養三寶

及善知識父母師長心恒不捨承事恭敬無
有斷絕是爲大勢圓滿之因若諸菩薩心恒
愛樂丈夫之身於女人相常生厭棄怖畏女
色猶如猛火於丈夫身生福德想亦勸衆生
厭離女身欣丈夫相是爲丈夫圓滿之因若
諸菩薩恒以身力供事衆生如理作役皆往
營助於師長處按摩塗洗及以種種上妙飲
食施諸飢渴咸令充飽令其安樂色力增盛
是爲勇力圓滿之因如是菩薩修習八種異
熟之因感異熟果善男子如是八種異熟之

卷六

十六

因復由三緣而得增長能感圓滿廣大饒益
殊勝異熟云何爲三一者清淨心二者清淨
行三者清淨境若諸菩薩內心清淨所有善
根悉用迴向阿耨多羅三藐三菩提及證甚
深一味法界廣大信樂純一無雜勤求修習
不顧身命與善知識同一志行見同法者深
生歡喜日夜思惟念念隨順行住坐卧心無
厭足是爲第一發清淨心若諸菩薩即於如
是廣大志樂所起善根長時修習念念無間
方便善巧皆使成就未受行者令得受行已

受行者令其堅固是爲第二行清淨行若諸
菩薩於彼一切所行境中令心清淨能正發
起令行調柔如是趣求至究竟果是爲第三
趣清淨境善男子云何菩薩異熟果耶謂由
菩薩壽量具足故能得長時無間修習所有
善根積集增長能久住世自利利他是爲壽
命圓滿之果又由菩薩色相端嚴衆生愛敬
故一切大衆咸來歸仰凡所發言無不樂聞
既聞法已皆悉順行是爲色相圓滿之果又
由菩薩種族真正故世所宗重令諸衆生隨

卷六

十七

順菩薩所有言教精勤修習速疾捨離諸不
善業修諸善業是爲種族圓滿之果又由菩
薩自在圓滿具足財位故能以種種珍寶僕
使給施羣生隨其所須咸令充足以此攝取
然後調伏而成熟之是爲自在圓滿之果又
由菩薩成就實語故能以愛語攝諸衆生讓
伏成熟令其信受皆得解脫是爲信言圓滿
之果又由菩薩豪貴自在有大勢力故能令
衆生感德從化心生慚愧尊重愛樂凡所出
言隨順不逆是爲大勢圓滿之果又由菩薩

具足圓滿大丈夫相諸根成就無有殘缺是故堪爲勝功德器精進勤求一切智境得無所畏無障礙行能大饒益一切衆生所作隨心皆無障礙一切世間諸天及人無能譏毀是爲具足大丈夫相圓滿之果又由菩薩成就勇力普能積集一切善法安樂成就諸衆生界勇猛精進成就智通是爲勇力圓滿之果如是名爲異熟因果云何福智謂施戒忍三波羅蜜名之爲福般若波羅蜜名之爲智精進禪定亦名爲福亦名爲智謂因精進修

施戒忍慈無量等則名爲福若因精進起聞思修則名爲智又因精進修蘊善巧處善巧界善巧緣起善巧處非處善巧能知四諦善不善法煩惱勝劣黑白諸業微細觀察皆名爲智若因禪定修四無量是名爲福若因禪定修行般若及諸善巧則名爲智是故菩薩能大饒益一切衆生於諸刹利大衆會中而爲師首普能隨順一切諸佛轉正法輪能自調伏亦能調伏一切衆生令其速入一切智道菩薩成就如是種種殊勝因果即能疾得

五六

十八

阿耨多羅三藐三菩提

大方廣佛華嚴經卷第二十六

音釋

嵐毗尼 梵語林名也嵐盧舍切 履踐 履力紙切踐在

行踐 也 荆棘 荆音京楚木也棘紀力 環珮 環珮獲

踏也 也 璧也 也 璊 璊昧切 臟 臟祖浪切 銜 銜胡監切

頰 頰虛業切 匱 匱求位切

銜 銜物曰 脇 脇虛業切 腋 腋下也 匱 匱求位切

永樂北藏

華嚴經普賢菩薩行願品

第三一册

永樂北藏

華嚴經普賢菩薩行願品

第三一册